



ROBERT THIEL

**"E TURISTANAN CU TA BISHITA ARUBA
MESTER TENDE NOS MUSICA TAMBE"**

"Mi a cuminsa canta for di tempo cu mi tabata chikito, 7 aña, 8 aña mi tabata canta caba, esey tabata e interes di mi famia, mi omonan tabata musico y nan tabata tin un banda y cada uno tabata toca un instrumento, nan tabata 11 ruman", Robert ta conta di su interes den musica. Musicalmente Robert tabata gusta tur slaginstrument tempo cu e tabata chikito, cuarta, guitarra, e tabata traha instrument cu botter di awa, dependiendo con yen bo yenan nan ta bira un diferente tono, pasobra nan no tabata tin suficiente placa pa compra instrumento.

Na edad di 12 aña Robert a bai muziekschool na Paradera, na unda Maybeline Arends Croes, recién yega for di Hulanda tabata duna les di musica. Eynan e a bai les pa 3 aña na unda e a siña canta y toca mas instrumento, tambe lesa nota. Ora cu e a caba e a haya su getuigschift, anto e ora e a kies pa bai profundisa su mes den piano. Awor Robert ta toca diferente instrumento cu e a train. E tabata

gusta toca wals, su omo tabata tin masha hopi disco di Padu y Rufo, anto segun locual e tabata scucha e tabata purba toca.

Awor cu tin sequence, Robert por toca y anima un fiesta hunto cu un solo hende, pero antes bo mester tin full un banda. Robert a bai canta cu un banda na Noord tempo cu e a caba scol. "Un dia un guy a bai toca, anto su guitarra a kibra, anto e ora nan a trece un piano pa mi toca", Robert ta conta, "mi a tembla un poco, pero e a bai bastante bon". For di e dia ey te awe, Robert ta toca den banda, actualmente den su propio Happy Band.

Despues di esaki Robert a bai Spijkenissen, Hulanda, na unda e a bai toca cu un ruman di dje den un band. Su ruman homber Efi tabata tin un banda di man solamente, anto e no tabata por a toca piano, y pesey Robert a bai toca cu ne. Hunto cu nan tabata toca tres docente di Conservatorium, cu forma parti di e banda como saxofonista, trompetista y trombonista, anto den nan oranan liber nan a siña Robert hopi practica y teoria den banda.

"Mi a cuminsa toca cu sequence, y na Hulanda mi tabata toca cu tres persona so, pero mi tabata tin miedo cu nan no lo accepta esaki na Aruba", Robert ta bisa. E tempo ey Robert a sali cu su banda Los Bravos, y nan musica a wordo bon acohi. Despues di e temporada cu Robert a pasa na Aruba pa Carnaval, e a dicidi cu e no lo bai bek Hulanda, te dia di awe. "Bo sa cu Aruba ta dushi no?", Robert ta puntra, "Akinan ta otro cu cualkier parti di mundo, na Hulanda of Alemania of cualkier parti di Europa bo ta toca, pero e hendenan ta friew, nan ta antisocial, pero na Aruba e hendenan ta contento, nan ta hari y haci chasco, ta pa esey e turistanan ta bin, pa e felicidad cu ta reina ariba nos isla". Bo ta mira e felicidad na e caranan di hende, anke nan por tin nan problema, nunca nan no ta demostre. "Imahinabo si mi ta bayendo un fiesta pa toca, anto nan bin dal den mi auto anto lage na werki, mi mester yega na e fiesta cu yen di alegria pa anima e invitadonan.

Asina Robert a haya varios contract den e ramo turistico y cu hotelnan y a dicidi di keda Aruba. Algun tempo despues, nan a dicidi di bai ariba nan mes, y Robert a sigui toca na Hotel. "Amio ta gusta toca cosnan di Aruba tambe, e tursitanan ta bin pa nan conoce nos cultura, nan mester bai bek merca conociendo algo di nos pais, e musica local mester keda".

Robert su carrera tocando musica bailable, a cuminsa mas cu 10 aña pasa na un club nocturno y tambe tocando na cas di famia, na unda e ta hiba un persona mas pa yude. "Mi ta kere cu locual e hendenan ta gusta ta cu e repertorio ta varia, y cu nan por pidi un variacion grandi di cantica y ritmo y mi por complace cu esaki", Robert ta bisa. Actualmente Robert tin un disco ariba mercado cu ta titula "Robert Thiel y su Piano".

Pa mas informacion tocante Robert su CD, of si bo ta desea di tuma contacto cu Robert, por favor yama tel : 9635299.